

TIADA UGUTAN TURUN BENDERA PUTIH – Pengerusi JKKK

KUANTAN, 02 JULAI 2021 : “Tiada sebarang ugutan turun bendera putih dilakukan sebagaimana yang telah ditularkan di media sosial sejak semalam,” kata Pengerusi Jawatankuasa Kemajuan dan Kemakmuran Kampung (JKKK) Kampung Bukit Setongkol, Haji Kamarudin Ahad.

Menurutnya, ada pihak yang memaklumkan mengenai bendera putih dipasang di kawasan Bukit Setongkol pada Rabu lalu iaitu satu di tiang telefon dan satu lagi di kawasan depan perumahan (bukan di rumah berkenaan).

“Kita (bersama ahli JKKK) pergi tengok pada pukul 4 petang dan saya dapati dua bendera tu (betul telah dipasang)..kita pun jumpalah penduduk terlibat bertanya khabar, kita fahamlah maksud bendera putih tu perlukan bantuan ataupun untuk menzahirkan ada masalah.

“Kita jumpa dalam lima keluarga terlibat dan berpesan bahawa pihak JKKK akan usahakan bantuan di mana saya telah maklumkan kepada UMNO Bahagian minta lima paket barang,” katanya ketika ditemui Unit Komunikasi dan Media Pahang (UKOMP), di sini hari ini.

Dalam pada itu, beliau berkata ada memaklumkan perkara berkenaan kepada pihak berkuasa kerana diminta berbuat demikian jika ada bendera putih dikibarkan.

“Saya pulang ke rumah untuk sembahyang (Asar) terlebih dahulu dan datang semula ke rumah penduduk berkenaan untuk menyertai pihak polis yang turut hadir untuk ambil maklumat.

“Bantuan telah disalurkan kepada lima keluarga terlibat (Rabu lalu) dan kita kemudian terima lapan lagi keluarga yang mendaftar untuk menerima bantuan sama,” katanya.

Katanya lagi, pihak JKKK dan polis ada menasihati penduduk terlibat agar menurunkan bendera putih selepas bantuan diterima dan pihak JKKK telah maklum keadaan mereka dan akan pantau dari semasa ke semasa.

“Kami berikan nasihat (bukan ugutan) supaya menurunkan bendera putih yang dikibarkan di tiang telefon di tepi jalan utama yang agak jauh dari rumah mereka.

“Sumbangan bantuan juga telah disalurkan oleh pihak kami walaupun pengibaran bendera putih di tempat-tempat awam seperti tiang lampu, jejantas, tiang telefon memberi signal yang tidak tepat untuk kami menghantar bantuan,” katanya.

Beliau turut meminta agar tiada pihak yang tiada pihak yang salah anggap dan sengaja mengambil kesempatan di atas situasi yang berlaku demi kepentingan masing-masing. **-PAHANGMEDIA**

Disediakan oleh Unit Komunikasi dan Media Pahang (UKOMP)

#MajuTerusPahang
#Pahang1st
#KerajaanNegeriPahang
#PahangGo

Oleh : Fairus Mohd & Shazli Sufi Che Unik

(LIPUTAN BERGAMBAR)





